

春秋不傳

卷十之十二



春秋不傳卷十

寶應湯啟祚著



昭公

名稠襄公之庶子也
按諡法威儀恭明日昭

庚申

周景王

元年

晉平十七

齊景七

衛襄三

蔡靈二

鄭簡

宋平三十五

秦景三十六

楚邲敖四卒

吳夷末三

春王正月公即位

于是子野之得正而斃無惑焉

叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢

此陳侯之弟招也何以不言弟諸侯之尊兄弟不得以屬通其

曰公子某者正也其以事接言之也謂夫不挾其弟者也然何以有字而不名者則謂夫不爲大夫者也夫招一人之身何以有挾有不挾他之挾者皆有寵也而招則莫之有寵焉者其弟之也固以其殺世子而甚之也故于此焉示不以累陳侯也
三月取鄆

鄆者何莒邑也何以不言伐莒諱乘莒亂也

夏秦伯之弟鍼出奔晉

六月丁巳邾子華卒

晉荀吳帥師敗狄于大鹵

大鹵者何大原也大原曷爲謂之大鹵中國曰大原夷狄曰大

鹵號從中國地人名從主人雖然中國之大原也曷爲從狄甚敗狄也若已出竟者然謂非先王薄伐之意也

秋莒去疾自齊入于莒

去疾以國氏使之得有莒也傳曰天無二日民無二王則國無二君也于是莒有君矣去疾何以國氏乎正也其爲正若何討賊也密州弑焉展輿立焉而去疾不立焉而後因齊以討焉可也其曰自齊許齊也雖然正則其言入何難也

莒展輿出奔吳

胡氏曰展輿莒子也曷爲不言莒子爲弑君者所立既立乎其位位而不能討賊則是與聞乎故也斯不可以有國矣不可以

有國則曷爲以國氏程氏曰罪諸侯之與其立也虢之會展與無列何以見諸侯之與其了乎于是展與之立期年矣諸侯未有問其罪者然則虢之無列國亂故耳非諸侯之不與其立也叔弓帥師疆鄆田

疆之爲說猶竟也疆鄆田者何疆取諸莒之鄆之田以爲竟也曷爲不係諸莒諱亟乘莒亂也

葬邾悼公

冬十有一月己酉楚子麋卒

楚公子比出奔晉

辛酉周景王二年楚靈王度元年

春晉侯使韓起來聘

夏叔弓如晉

秋鄭殺其大夫公孫黑

冬公如晉至河乃復季孫宿如晉

公如晉曷爲至河乃復不敢進也曷爲不敢進晉不納我也奚以明其然也其至有地固非無意於至也至河矣復言乃有故也我既非無意於至而又有故則是晉故也夫以儼然周公之胄赫赫魯國而鎮撫之一旦輕身以修鄰好夫何敢卻而弗納乎無亦我動之不以禮而先自侮以來人也以公則不入以季則入焉乃晉也于公則弗納于季則納焉然則公之躁而動也

春秋左傳卷一
季之抗而上也晉之下而比也不幾參見已乎

壬戌周景王六年三年

春王正月丁未滕子原卒

夏叔弓如滕五月葬滕成公

秋小邾子來朝

八月大雩

冬大雨雹

北燕伯款出奔齊

北燕者何或者其非燕與或者其有南燕與

癸亥周景王七年四年

春王正月大雨雹

災而月未甚也而此之月甚也何甚乎爾亟也謹之也

夏楚子蔡侯陳侯鄭伯許男徐子滕子頓子胡子沈子小邾子宋

世子佐淮夷會于申

曷為不殊淮夷胥夷諸侯也曷為胥夷諸侯霸楚子也會先楚

子是諸侯之使楚子主是會也以楚子主會固宜諸侯之皆淮

夷也

楚人執徐子

夷相執而書重執也會言爵執言人惡執也

秋七月楚子蔡侯陳侯許男頓子胡子沈子淮夷伐吳執齊慶封

春秋左傳

卷十

四

殺之遂滅賴
時伐也伐以月謹其遂有滅也此伐吳也何以執齊慶封殺之
為齊討也慶封者齊賊也齊賊則何以以國氏決為齊討也為
齊討何以伐吳而後殺之言吳為齊之逋逃主也雖然既為齊
討則宜以賊辭其曰執何慶封不為楚子服也曷為不服楚子
不足以服之也

九月取鄆

鄆既滅矣然則是莒之邑也何以不係諸莒諱亟也

冬十有二月乙卯叔孫豹卒

甲子周景王八年五年秦景四卒

春王正月舍中軍

舍中軍者何奪公中軍也孰奪之季孫也于是季孫強之甚僭
之甚公纔有一中軍耳而猶非其意也復奪焉而一民遂非公
有矣然則是奪公中軍也其曰舍何子若曰使臣而可奪君則
天下之大防壞矣故若出諸公意者然存君臣也且不使季孫
得專魯也是則聖人之微辭也嗟乎君臣之誼尙何說哉尙何
說哉而春秋其可以弗作已夫

楚殺其大夫屈申

公如晉

夏莒牟夷以牟婁及防茲來奔

春秋左傳

卷十 昭公

五

春秋不傳 卷一 五
其言及防茲來奔何公羊子曰不以私邑累公邑也

秋七月公至自晉

戊辰叔弓帥師敗莒師于蚡泉

秦伯卒

冬楚子蔡侯陳侯許男頓子沈子徐人越人伐吳

徐越皆僭王者也且越始見也何以皆得稱人善伐吳也何善乎伐吳于是吳匿齊賊楚雖殺之矣猶未之服也則固有伐道也雖然何解于其僭王焉曰伐吳也吳亦僭王者而有罪則彼善于此也

乙丑周景王六年 杞文十四卒 秦哀公元年

春王正月杞伯益姑卒

葬秦景公

秦之赴多矣我未有會其葬者以遠而怠于禮也今茲雖遠而弗怠焉故知昭公之習于儀也

夏季孫宿如晉

葬杞文公

宋華合比出奔衛

秋九月大雩

楚蘧罷帥師伐吳

冬叔弓如楚

齊侯伐北燕

丙寅周景王七年 衛襄九年 杞平公郁釐元年

春王正月暨齊平

暨云者不得已之辭也非我所急也夫齊強而魯弱久矣我何以不急之于是公婚于吳而勤于楚有外援之恃焉齊是以急之也夫外求援而于吳若楚非也由內之外曰及由外之內曰暨

三月公如楚

叔孫舍如齊涖盟

夏四月甲辰朔日有食之

秋八月戊辰衛侯惡卒

穀梁子曰鄉曰衛齊惡今日衛侯惡此何為君臣同名也君子不奪人名不奪人親之所名重其所以來也王父名子也

九月公至自楚

冬十有一月癸未季孫宿卒

十有二月癸亥葬衛襄公

當時而日危不得葬也何危乎衛襄公繫其冢子也元其季子也則是廢長而立幼也

丁卯周景王十八年 衛靈公元元年 陳哀三十五年 是年滅

春陳侯之弟招殺陳世子偃師

鄉曰陳公子招今日陳侯之弟招何也穀梁子曰盡其親所以惡招也兩下相殺不志乎春秋此其志何也世子云者維君之貳也殺世子目君此其不目君何也君不得主也殺之自母弟是不有母兄也則是弑君之漸也

夏四月辛丑陳侯溺卒

叔弓如晉

楚人執陳行人于徵師殺之

殺之抑又甚矣

陳公子畱出奔鄭

秋蒐于紅

非蒐時也且非蒐所也不月無煩月也言秋而見矣或曰厭詳也于一民非公有是季孫之志而已公無與焉

陳人殺其大夫公子過

稱人以殺國亂無政焉耳

大雩

冬十月壬午楚師滅陳執陳公子招放之于越殺陳孔奐

招何以復稱公子執而放之罪之不以其罪也殺陳孔奐無罪也

葬陳哀公

陳滅矣何以葬陳哀公穀梁子曰不與楚滅閔公也

春秋左傳卷十
戊辰周景王十九年

春叔弓會楚子于陳

楚滅陳而不救復于陳焉會之其何譏耳已

許遷于夷

夏四月陳災

陳已滅矣其言陳災何閔陳而存之也閔陳而存之者楚雖滅陳不與楚得以滅之也

秋仲孫矍如齊

冬築郎囿

于是公無徒是季孫之志也夫城費猶志之矣而况為非事于

非地也

己巳

周景王十年

宋平四十四卒

宋平四十四卒

春王正月

夏齊欒施來奔

秋七月季孫意如叔弓仲孫矍帥師伐莒

中軍舍矣曷為三卿并將非舍也奪諸公而已夫三軍魯之舊也何以知有中軍于是叔孫氏豈無一軍是仍四軍也

戊子晉侯彪卒

九月叔孫舍如晉葬晉平公

十有二月甲子宋公成卒

所見者也是無史闕也何以不言冬意者師傅之失而後儒之所莫敢益與

庚周景王十有一年晉昭公夷元年蔡靈十二年殺是年滅宋元公佐元年

春王二月叔弓如宋葬宋平公

夏四月丁巳楚子虔誘蔡侯般殺之于申

何以名楚子而言誘絕之也何以絕之諉也信者人之所以立也義者人之所以立也貪欲無藝而誘殺人之君以取其國吾不知其何以立也故君子謂其去死也幾希矣雖然般者弑父與君是亦為蔡討賊也罪獨不可以般薄乎曰楚非能討之地利其土地耳已

楚公子棄疾帥師圍蔡

既誘殺其君矣奈何復以重師圍其國也

五月甲申夫人歸氏薨

大蒐于比蒲

蒐曰大踰制也夫君有三年之感而國不廢一日之蒐則是有三年之喪而無一日之感也烏乎可

仲孫獲會邾子盟于祿禚

秋季孫意如會晉韓起齊國弱宋華亥衛北宮佗鄭罕虎曹人杞人于厥憇

殆將救蔡也何以不言救蔡不能救蔡也不能救蔡則何以無

貶非力所及也于是楚強而晉弱矣

九月己亥葬我小君齊歸

冬十有一月丁酉楚師滅蔡執蔡世子有以歸用之

以歸者易辭也執以歸者難辭也不服也用之虐之也蓋以其不服而強執以虐用之也有稱世子未立乎其位也君之定位也以初喪先君之殺也月閱八矣曷為猶未立乎其位自先君之殺而國圍焉儼然在圍城之中捍禦守備之不遑固未暇立乎其位也然則若有者是能不與父母之仇共天下而又不忍立乎其位與民守國效死弗降至于力屈然後就擒雖虐用其身而不顧者也是故有稱世子者胡氏曰有之為世子之道得

矣

辛周景王十有二年鄭簡三

未五年十六卒

春齊高偃帥師納北燕伯于陽
納不于國而于邑耦都也出也名入也不名正也正則其言納何內不受而脅之也

三月壬申鄭伯嘉卒

夏宋公使華定來聘

公如晉至河乃復

五月葬鄭簡公

楚殺其大夫成熊

秋七月

冬十月公子愁出奔齊

楚子伐徐

晉伐鮮虞

晉以國舉狄之也曷為狄之楚滅陳矣不能救也復滅蔡矣不能救也然猶曰非力所及也而今者興師以伐人國則是非力所不及也是何不移是師以向楚也夫所夷乎楚者為其不義而多伐人國也今復憑陵上國虐二王之裔而斬其祀而晉恬然若罔聞焉而惟伐狄是事其何義之為亦奚以異于楚乎噫晉者霸國也于是而狄諸則于是而弗霸諸矣聖人之傷不其

重而

壬周景王十十有三年蔡平公廬元年楚平王復封之也 鄭定公寧元年 陳惠公吳元年楚平王復封

之也 楚靈十二弑

春叔弓帥師圍費

費者何季孫之邑也則內邑也曷為命卿為將舉大眾而圍之若敵然叛也季孫之專魯久矣雖不叛猶叛也魯豈不亦季孫之魯也者曷為獨于此焉叛非季孫叛也其臣叛季孫也夫已則有君而已實叛之亦胡以禁人之不我叛乎然則費之叛季孫導之矣雖然何以不言叛而逸叛者胡氏曰春秋之法不書內叛反求諸已而已矣

夏四月楚公子比自晉歸于楚弑其君虔于乾谿

弑不言歸也歸而弑易弑也惡與之弑者也歸而弑不必言自也自而歸弑惡所自也夫虔之為君亦甚矣然而君不可弑也則弑君者不可以有奉也雖然比自虔之立而出奔矣豈嘗一日君之其日其君也何義未絕也蓋君臣之義不惟其跡惟其心若夫鱗之于衛也則去而絕者也胙之于魯也則即不去而亦絕者也而比皆非其倫也是故成之為其君也其地謹弑也楚公子棄疾殺公子比

此討賊也曷為不以賊辭歸獄于棄疾也曷為歸獄于棄疾棄疾非能討賊也欲并去之而已比之弑君也言歸固言易也言

有為之內者也孰為之內其殆棄疾乎夫既相與弑君則必君之矣又從而殺之是以一舉而去二害也然則比弑者一君而棄疾弑者二君也故不去比之公子者所以甚棄疾之殺也雖然何以不言弑比固不能君棄疾也

秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平邱

畏于楚也焉知之其盟曰同有同欲也夫畏于楚而為會若盟末也

八月甲戌同盟于平邱公不與盟

公不與盟者何公不得與盟也公何以不得與盟晉不與公以

春秋不傳
卷一
得與盟也然則是辱也何以不諱惡是盟也惡是盟則何以不諱幸之也以爲其盟不善而得不與焉幸也故盟與會同地也而再言平邱惡之也

晉人執季孫意如以歸

稱人以執非霸討也季孫之專魯甚矣曷爲非霸討執之不以其罪也

公至自會

蔡侯廬歸于蔡

陳侯吳歸于陳

曰歸順之也夫蔡與陳皆滅矣何以不言復歸不與楚以得滅

也故其歸也曰于言國其所宜歸也廬與吳也者皆亡世子之子也廬之父曰世子有有之父曰靈公般吳之父曰世子偃師偃師之父曰哀公溺則皆未嘗有國者也何以稱侯言爵其所固有也蔡王室之親陳列聖之裔也旣爵其所固有則何以名受封于楚也夫蔡王室之親陳列聖之裔也獨奈何不恃先王之命而惟楚命之以是得國之道非也何以知其受封于楚滅之自楚諸侯不能救則封之必自楚而諸侯不能與也然則何以不言自楚不與楚之得封也

冬十月葬蔡靈公

穀梁子曰變之不葬有三失德不葬滅國不葬弑君不葬然且

葬之不與楚滅且成諸侯之事也

公如晉至河乃復

辭我君矣復執我臣既執我臣矣更復辭我君其甚矣乎

吳滅州來

癸酉周景王十有四年曹武二十七年楚平王居元年

春意如至自晉

大夫不致也執則致閔之也意如惡然而致穀梁子曰見君臣之禮也

三月曹伯滕卒

夏四月

秋葬曹武公

八月莒子去疾卒

昭公之習于儀也未嘗不會諸侯之葬也雖遠而秦微而杞薛皆會之矣若大而晉宋邇而滕則卿會之矣是有過于禮無不及于儀也何以獨不會莒子葬乎蓋季孫之志也于是季孫怨莒子季孫之執于晉莒子之為也奚以明其然也于是魯未嘗失禮于晉而無怨于他國惟是會取莒鄆復疆其田且取其鄙耳平邱之會莒子與焉故知莒子愬之也雖然怨不棄義惡不忘親怒不廢禮古之道也季孫何得修怨而棄禮也而況怨之啟自季孫也乃既以之累乎公而復以之施諸莒子是以君子

謂季孫之不臣也

冬莒殺其公子意恢

甲周景王十有五年曹平公須元年
戊周八年吳夷末十七卒

春王正月吳子夷末卒

二月癸酉有事于武宮

事而曰有非事也夫有事者時祭也曷爲謂之非事于武宮也
于武宮則曷爲謂之非事顯考祖考享嘗乃止諸侯之祭法也
武公歷世十有三矣然則何以有事自成公立武宮以來固常
有事也然而夫子以爲非事也

籥八叔弓卒去樂卒事

嘗讀禮曾子問矣有諸侯當祭而不得終禮者若而事焉而無
大夫卒之文也夫大夫諸侯之副而先祖之所眷也曷爲無其
文衛太史柳莊之寢疾也君曰若疾革雖當祭必告然則大夫
之卒當祭則不告也何以不告大夫之卒雖戚固不加于祭之
敬也乃此何以稱焉卒于涖事也何以知其卒于涖事先言籥
入而後言卒是卒于涖事也然則如之何胡氏曰去樂卒事焉
其可也禮卽不必有其文而固可以義起者也緣先祖之心見
大臣之卒必有聞樂而不樂者緣孝子之心視俎豆之陳又有
徹饌而不忍者去樂卒事其禮之變而得其平者乎夫苟得其
平則常事耳何以書記變也

夏蔡朝吳出奔鄭

六月丁巳朔日有食之

秋晉荀吳帥師伐鮮虞

嘗于伐鮮虞狄諸矣而此則無譏焉耳然則非狄其伐鮮虞也狄其不救陳與蔡而伐鮮虞也

冬公如晉

乙亥周景王十有六年 晉昭六年 吳僚元年

春齊侯伐徐

楚子誘戎蠻子殺之

亦誘而殺也寧不同于蔡般也者乃楚子何以不名則以楚之

為楚也戎蠻子何以亦不名無罪也諸侯之卒名正也以誘而殺者雖卒不名亦正也乃蔡般何以名蔡般弑父者也則有罪也或曰戎蠻子不名未同盟會也

夏公至自晉

曷為戾于今乃致見止也曷為不言見止諱之也其致不月深諱之也夫公之朝于晉也三至于河而不得入焉其兩既得見之矣而又見止旃則其困不其甚矣然而公不能因困而致亨也

秋八月己亥晉侯夷卒

九月大雩

春秋不傳

卷一 昭公

七

季孫意如如晉

冬十月葬晉昭公

丙子周景王二十有七年晉頃公去疾元年

春小邾子來朝

夏六月甲戌朔日有食之

秋邾子來朝

八月晉荀吳帥師滅陸渾之戎

大夫帥師而名無譏焉耳夫滅人之國矣何以無譏陸渾之戎

在王畿之側也

冬有星孛于大辰

大辰者何心宿也孛于大辰加諸心宿也不言入止星也

楚人及吳戰于長岸

人楚而吳舉國狄吳也戰不言敗者勝負敵也夫楚大而吳小

也勝負何以敵于是吳且強而楚且弱也

丁丑周景王二十有八年曹平卒

春王三月曹伯須卒

夏五月壬午宋衛陳鄭災

公羊子曰何以書記異也何異耳異其同日而俱災也穀梁子

曰其志以同日也其日亦以同日也

六月邾人入郟

秋葬曹平公

冬許遷于白羽

戊寅周景王二十二年十有九年曹悼公午元年

春宋公伐邾

舉爵以言伐正之也于是邾人入郟固有罪可聲也

夏五月戊辰許世子止弑其君買

止未嘗弑也何以謂之弑誅其心也是夫子之所見者也子以爲止即不必有弑父與君之事而有弑君之心弑父之心也是以君子聽止也何以知其未嘗弑世子弑君則必立乎其位也而止不立不弑也弑君不葬也而悼公葬非弑也

己卯地震

秋齊高發帥師伐莒

冬葬許悼公

此不葬者也何以葬見其非弑也既見其非弑然則原止乎哉曰非也固欲即止以示則也子若曰天下之爲臣若子者即不必有弑父與君之事而苟有是心斯歸之獄矣如許世子止者是也天下後世其無若許止然豈原夫許止哉或曰猶之葬蔡景公也

己卯周景王二十二年十有九年蔡平卒

春王正月

夏曹公孫會自鄆出奔宋

胡氏曰奔未有言自者此其言自何劉敞曰待放也古者大夫有罪待放于其境三年君賜之環則復賜之玦則去踰境則為位向國而哭素衣裳冠不說人以無罪此去國之禮也是故曹無大夫而曰公孫與之也待放而後出奔則會之為公孫之道無失矣

秋盜殺衛侯之兄縶

兄云者母兄也母兄則宜立者也母兄而不立則廢長而立幼也盜賤者也母兄至親且貴者也既有奪嫡之嫌而又使盜得殺之故目衛侯累之也

冬十月宋華亥向寧華定出奔陳

月奔謹亂始也乃辰佗疆之奔何以不月所據者其采則亂猶未切也

十有一月辛卯蔡侯廬卒

庚辰周景王二十有一年蔡侯朱元年奔悼公東國元年

春王三月葬蔡平公

夏晉侯使士鞅來聘

宋華亥向寧華定自陳入于宋南里以叛

叛言自惡所自也夫書入以叛者若戚也晉陽也朝歌也蕭也固未有以所入係諸其國者也此其係以宋何不係諸國者入

其采邑也而此非其采邑也曰宋南里則固宋之南鄙也蓋入國都矣故君子謂其亂爲已切矣

秋七月壬午朔日有食之

八月乙亥叔輒卒

冬蔡侯朱出奔楚

公如晉至河乃復

辛巳周景王二十五年崩猛立未踰年是爲悼王二十有二年

春齊侯伐莒

宋華亥向寧華定自宋南里出奔楚

奔自其所據言專也南里終係諸宋言宋之逸賊也出奔楚言

楚之數慝也一人叛耳而辭繁而不殺焉言諸侯之不能救患而討亂也

大蒐于昌間

蒐時也何以書踰制也且非蒐所也况仲春而後蒐亦非時也

夏四月乙丑天王崩

六月叔鞅如京師葬景王

有親會諸侯之葬者矣乃天王之葬僅卿會焉不臣也然猶愈于以微者且竟不往者也是則昭公之習于儀也夫天子七月而葬者也五月而葬慢甚也抑亦亂故也

王室亂

王室者何京師也京師曷爲謂之王室王者以天下爲家則以京師爲室也乃曷爲不言京師而謂之王室亂也亂則曷爲不言京師而謂之王室以累景王也何累乎景王王室之所以亂者猛朝之爭立故也而猛朝之所以爭立也則景王無樹子而猛正而朝嬖故也夫王者以京師爲室以王畿爲堂以諸夏爲庭戶以四夷爲籬籬治外者必自內治遠者必自邇蓋室者家之本也京師者天下之本也傳曰其本亂而未治者否矣然則天下之不治景王之爲也是故其事亦旣筆諸矣雖不言王室亂可也所言乎王室亂言景王之寵孽匹嫡以貽亂于天下也

劉子單子以王猛居于皇

以者不以者也胡氏曰師而曰以能左右之也地而曰以能取與之也人而曰以能死生之也故尊不以乎卑也貴不以乎賤也大不以乎小也乃王猛曷爲以于劉子單子乎以累景王也猛惟無寵于景王故不能自定其位而制在劉單也制在劉單者能廢立之也是以知景王之弱其後嗣而輕其宗社也是未踰年者也何以稱王言當立也旣當立矣又何以稱名明嗣君也且以別于諸王子也故雖臣不名而君名不嫌也曰居正之也易曰王居无咎正位也

秋劉子單子以王猛入于王城

王城者何京師也曷爲不言京師而謂之王城示有王也天下

春秋左傳卷一
無事則曰京師天下有事則曰王城若曰是王城也者固王者之居也是夫子之變文也曰入難辭也再言劉子單子之以王不正之也夫所以者正則其為不正若何劉子單子非能以王猛為正而輔之也特挾天子以令諸侯而專國柄者也

冬十月王子猛卒

已稱王矣又曰王子未踰年也未踰年則不成喪也名未踰年也曰卒未踰年也不日未踰年也

十有二月癸酉朔日有食之

王敬王二十有三年蔡悼元年

春王正月叔孫舍如晉

癸丑叔鞅卒

晉人執我行人叔孫舍

晉人圍郊

郊者何王子朝之邑也曷為圍之以勤王也夫以勤王則正也何以稱人胡氏曰微之也所謂以其事而微之者也當是時天子蒙塵晉為方伯不奔問官守省視器具而徐遣大夫往焉勤王之義固如是乎

夏六月蔡侯東國卒于楚

不葬卒于楚蔡固不能國矣

秋七月莒子庚與來奔

戊辰吳敗頓胡沈蔡陳許之師于雞父胡子髡沈子逞滅獲陳夏
鬻

累數六國未陳也不言主者為楚也六者皆楚與也固莫適主也則何以不言楚楚不與敗也先頓胡沈于蔡陳許君臣也胡沈子後言滅有滅道也若曰非吳所得滅也自滅而已陳大夫先言獲強獲也或言獲或言滅君臣之辭也君死于位曰滅生得曰獲大夫生死皆曰獲

天王居于狄泉尹氏立王子朝

直稱天王正之也曰立不宜立也尹氏天子之卿也曰氏者譏世卿之擅亂也蓋尹氏之世卿不善也自隱以來譏諸矣朝篡

者也曷為不去其王子累景王也言寵自景王也

八月乙未地震

冬公如晉至河有疾乃復

疾不志何言乎有疾公羊子曰殺恥也

癸未周敬王二十有四年蔡昭公申元年 杞平十八卒

春王二月丙戌仲孫矍卒

叔孫舍至自晉

大夫之致不氏執也致而氏賢之也何賢乎叔孫不以執故失行人之禮也叔孫可謂不辱君命矣

夏五月乙未朔日有食之

秋八月大雩

丁酉杞伯郁釐卒

冬吳滅巢

巢者何楚之與國也吳滅之楚曷為不救于是吳且愈強而楚且愈弱也

葬杞平公

甲申周敬王二十有五年杞悼公成元年宋元十五年

春叔孫舍如宋

夏叔詣會晉趙鞅宋樂大心衛北宮喜鄭游吉曹人邾人滕人薛人小邾人于黃父

于是諸侯無事何以會殆必勤王故也則辭何以無褻乎諸侯勤王職也

有鸛鶴來巢

日有非所有也日來非所宜來也日巢非巢者也何以書記異也

秋七月上辛大雩季辛又雩

再雩旱甚也雩不日而日再雩也言辛而不言日義取諸辛而不取諸其日也季者有中之辭也又有繼之辭也亦可以已之辭也夫為旱而再雩則所以禦旱之道非也何以書記災也

九月己亥公孫于齊次于陽州

出奔也謂之孫諱之也夫奔必有逐者孫則未有逐者有臣之辭也孫于齊矣曷爲次于陽州待齊命也夫弗克鎮撫魯國而待命于齊侯爲何如君矣雖然猶書其次固未絕于魯也既不絕之于魯而奔之卽不言奔固有逐之者在也于是季孫當國則季孫之惡甚焉

齊侯唁公于野井

唁公者何弔公也弔何以謂之唁生事曰唁死事曰弔齊侯何以唁公諸侯失國諸侯唁之禮也禮則常事耳何以書非禮也諸侯失國諸侯納之禮也諸侯失國諸侯唁之儀也非禮也于是不復以方伯連帥之事望齊侯矣

冬十月戊辰叔孫舍卒

十有一月己亥宋公佐卒于曲棘

曲棘者何宋地也諸侯之卒在其封內不地其地也何隱之也其隱之也何公羊子曰憂內也穀梁子曰邠公也邠公者何謀公也

十有二月齊侯取鄆

鄆者何內邑也春秋外取內邑不書諱也重失地也蓋土地者先君之所受諸先王者也乃此之書也何爲公取之也爲公取之若何齊侯取鄆所以居公也夫鄆者故公之土地也今者取諸自齊侯而後能居焉是已不能有而他人是保也其何君之

春秋不傳 卷一
爲于是見公之已絕于魯也

乙酉周敬王二十有六年 宋景公欒元年 楚平十三年卒

春王正月葬宋元年

三月公至自齊居于鄆

公次于陽州耳其日至自齊何穀梁子曰以齊侯之見公可以言至自齊也曰居正之也使之得有其土地人民也然則公雖在于鄆耳而四竟之內固無尺土一民爲季孫之所得有也

夏公圍成

成者何內邑也公自將而圍之何欲入而見拒也是君臣而敵國也于是季孫之不臣見焉于是公之不君亦見焉于是諸侯

之不能納君以討臣因與偕見焉

秋公會齊侯莒子邾子杞伯盟于鄆陵

時盟略之也略之者惡之也曷爲惡之盟無霸者而先公之所託殆盟納公也然而不聞納焉是謀而無成也

公至自會居于鄆

自是之致不月謹諸于其始矣

九月庚申楚子居卒

冬十月天王入于成周

成周者何京師也曷爲不言京師而謂之成周國之也曷爲國之于是天王弱且甚不言京師而謂之成周殆猶降黍離爲國

春秋左傳卷一
風之意也而聖人之感深矣月入詳之也詳之者重之也乃猛之入不月未成王也

尹氏召伯毛伯以王子朝奔楚

朝之奔也不言出使敬王得有天下也日以惡以之者也日奔惡奔焉者也夫三人以之得眾也再言王子專寵也然而終奔焉君子日邪之不能勝正也雖眾何為雖寵何為

丙周敬王二十有七年曹悼九卒楚昭王軫
戊周五年元年吳僚十二弑

春公如齊

公至自齊居于鄆

夏四月吳弑其君僚

楚殺其大夫卻宛

秋晉士鞅宋樂祁犁衛北宮喜曹人邾人滕人會于扈

冬十月曹伯午卒

邾快來奔

邾無大夫其日快接我也

公如齊

一歲再如齊亟入也然而無庸也則所託者非也

公至自齊居于鄆

丁周敬王二十有八年鄭定十六卒曹聲公野
亥周六年元年吳闔廬光元年

春王三月葬曹悼公

春秋左傳卷一 昭公

完

春秋左傳 卷一

公如晉次于乾侯 待晉命也于是更欲託于晉也

夏四月丙戌鄭伯寧卒

六月葬鄭定公

秋七月癸巳滕子寧卒

冬葬滕悼公

戊子周敬王二十有九年鄭獻公蠆元年

春公至自乾侯居于鄆

齊侯使高張來唁公

使人來唁淺事也何以亦書于是永不復以方伯連帥之事望

齊侯矣不地竟內也

公如晉次于乾侯

終待晉命也

夏四月庚子叔詣卒

秋七月

冬十月鄆潰

邑不言潰也邑而言潰潰公也于是昭公削迹于魯矣人之能遷善補過者恒存乎憂患乃公之在鄆已四年所而亡無愛徵民不見德至于潰旃故穀梁子曰昭公出奔民如釋重負易曰迷復凶其公之謂夫夫莒潰而日矣而此猶月之以同于他潰

何不忍詳也

己丑周敬王三十年晉頃十四年卒

春王正月公在乾侯

日在有不在也日在乾侯言不在魯也不在魯則何以言在乾侯以存公也言公雖不在魯而公固在也夫公之孫五年矣曷為逮于今乃存之前此者猶魯四竟之內也固無在而不可居也而今則客寄焉而已矣故不言居而言在也

夏六月庚辰晉侯去疾卒

秋八月葬晉頃公

冬十有二月吳滅徐徐子章羽奔楚

國滅而奔者不名有復道也章羽何以獨名既服而後奔也故不以復國之道望之也

庚寅周敬王三十有一年晉定公午元年

春王正月公在乾侯

每歲之首必一存公也

季孫意如會晉荀躒于適歷

君在外而專會彰其不臣也雖然晉霸國也荀躒霸國之大夫也而寵季孫意如以會禮則晉之為盟主可知矣荀躒之為人臣可知矣

夏四月丁巳薛伯穀卒

晉侯使荀躒唁公于乾侯

于是亦不復以方伯連帥之事望晉侯矣不言來非魯竟也

秋葬薛獻公

冬黑肱以濫來奔

黑肱者何邾大夫也曷為不係之邾邾不有之也邾不有之若

何黑肱之奔非黑肱之罪也邾有以致之也然奔而以地則罪

也何以黑肱為邾大夫濫者邾地也或曰文無邾後儒之所

莫取益者也

十有一月辛亥朔日有食之

辛卯周敬王三十年有二年曹聲五卒

春王正月公在乾侯取闕

目公正以存公也

夏吳伐越

志吳強也且志吳越難始也

秋七月

冬仲孫何忌會晉韓不信齊高張宋仲幾衛世叔申鄭國參曹人

莒人薛人杞人小邾人城成周

再言成周竟國之也傳曰天子有道守在四夷今惟王都之城

其為守也幾何矣然于諸侯之城之無譏焉

十有二月己未公薨于乾侯

春秋不傳
卷一
地于外隱之也夫有君而出之俾不能歸而終以客死季孫之
為臣何如而身出而不能歸終以客死即昭公之為君何如

春秋不傳卷十終

五世姪孫 顛校棐

春秋字音

昭公

元年 招 音韶
號 古薄
鹵 音魯

三年 雨 見隱九年

四年 雨 見隱九年

五年 舍 見襄十一年
蚡 扶粉反

六年 罷 見襄三十年

七年 暨 其器反又其冀反
鄉 音向

八年 招 見元年
蒐 所求反
過 見僖十六年

九年 獲 俱縛反

春秋不傳
卷十 昭公

十年 彪必幽彼求二反

十有一年 虔音乾

比音毗

稷子鳩反又七林反

愁魚斲反

十有三年 谿與溪同

與音預

十有四年 恢音魁

十有五年 未音昧

朝如字

十有七年 大見桓二年

十有八年 郟音禹又音矩

二十年 鄭莫公反

繫音蟄

二十有三年 齧五結反

朝如字

二十有五年 詣五計反

鸛其俱反

鴝音欲

孫見莊元年

唁音彥

邠訪同

二十有六年 朝如字

二十有七年 宛於阮反又於元反

二十有八年 乾見莊九年後言乾侯皆同

三十有一年 躒力狄反

適丁歷反

肱古宏反

三十有二年 幾平聲後仲幾同

春秋不傳卷十一

寶應湯啟祚著

定公

名宋襄公之庶子而昭公之弟也按諡法安民大慮曰定

壬辰

周敬王

十年

晉定三

年

齊景三十九

年

衛靈二十六

年

蔡昭

杞悼九

宋景八

秦哀二

十八

楚昭七

吳闔廬六

春王三月晉人執宋仲幾于京師

此元年也何以無正月不正定也何以不正定定無正也定何以無正于是昭公薨于乾侯是無正終也穀梁子曰先君無正終則後君無正始也先君有正終則後君有正始也夫先君無正終則後君何以無正始制在權臣也是夫子之微辭也公羊

子曰定哀多微辭主人習其讀而問其傳則未知已之有罪焉爾此晉大夫韓不信也何以稱人微之也何以微之貶也何以執宋仲幾于京師可以執也其可以執若何于是會城成周殆必以城成周之故執之夫以城成周之故執之則霸討也何以貶專也穀梁子曰不正其執人于尊者之所也然則是履霜之漸也既屢日成周矣又曰京師舉其常討臣之辭也

夏六月癸亥公之喪至自乾侯戊辰公卽位

公之薨越葬期矣曷爲迨于今乃致喪制在季孫也國君之立也定于初喪曷爲迨于今乃卽位制在季孫也蓋季孫專魯逐昭公俾薨于外又廢其子而徐樹其弟魯于是曠年無君焉迨

乎六月癸亥公之喪至自乾侯而後戊辰之日公卽位故不日者而日謹之也卽位之不日也以年決者不以日決也而至如定公之卽位則子以爲不可以不謹也

秋七月癸巳葬我君昭公

九月大雩

立煬宮

煬宮者何煬公之宮也立者何立者不宜立也煬公歷世二十有一矣喪事卽遠有進而無退宮廟卽遠有毀而無立夫何以立煬宮也意者季孫之以文其立公與欲文其立公則何以立煬宮煬公者魯公之子而考公之弟也魯一生一及其所由來

矣生者自考公昉也而及者自煬公昉也于是定公者昭公之弟也然則立煬宮之意蓋可知也已夫立武宮而日之矣乃此何以不日惡詳也

冬十月隕霜殺菽

月隕霜非隕霜月也日殺未可以殺也穀梁子曰未可以殺而殺舉重可殺而不殺舉輕日菽舉重也然則日草舉輕也何以書記災也

癸巳周敬王十二年

春王正月

夏五月壬辰雉門及兩觀災

公羊子曰其言雉門及兩觀災何兩觀微也然則何以不言雉門災及兩觀主災者兩觀也主災者兩觀則曷爲後言之不以微及大也何以書記災也

秋楚人伐吳

冬十月新作雉門及兩觀

日新有故也有故則其言作何譏僭也曷僭諸僭諸天子雉門者象魏之門也其外而南曰庫門其又外而南曰臯門其內而北曰應門其又內而北曰路門是天子之五門也故僖公嘗修泮宮復闕宮矣不書正之也而新作南門書固言僭也言南非一門也其言及兩觀兩觀亦僭諸天子者也

甲午周敬王十三年

春王正月公如晉至河乃復

先公屢辱于晉矣公甫除喪而朝之復辱焉恥也且公之位猶未定也則又危也

二月辛卯邾子穿卒

夏四月

秋葬邾莊公

冬仲孫何忌及邾子盟于拔

邾日子則未知其舉爵與其未踰年之君之稱與

乙未周敬王十四年曹隱四卒或曰弒也陳惠未周四年二十四卒杞悼十二卒

春王二月癸巳陳侯吳卒

三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚

晉之不合諸侯二十有三年矣今合十有八國之君以加兵于楚則是伐之也其曰侵何陋之也曷為陋之無庸也何以知其無庸于是與楚之國皆與于會則楚亦綦弱矣而又新加以十有八國之衆洩以天子之老猶能圍蔡至于五月而諸侯卒莫救焉則其無庸可知矣是故晉于是遂失諸侯而不能復合之矣故地而後言侵非之也曷非之非其疑也

夏四月庚辰蔡公孫姓帥師滅沈以沈子嘉歸殺之

帥師滅國以公孫言大夫專兵而覆人之國也以歸而名言國君失守社稷而不能死也曰殺之言諸侯利人之土地而復虐其君也參誅也

五月公及諸侯盟于臯鼫

曷爲不言會而言及我志也是晉以兵楚之命徵也殆非我志也其以我志之何以定公位也于是公受國于季孫意如未嘗上請諸天王也亦未嘗下告諸方伯也則位固難以定爾雖三年朝于晉猶未之納迨盟于臯鼫而後定焉是以前盟也不日言公位遂定也故以我志之也雖然何以凡言諸侯厭詳也

杞伯成卒于會

六月葬陳惠公

許遷于容城

秋七月公至自會

劉卷卒

劉卷者何劉子卷也劉子卷則何以不言爵削之也曷爲削之不臣也其爲不臣若何劉子者畿內之諸侯也畿內之諸侯不得赴于諸侯先王之制也夫爵者受諸先王者近在畿甸而不得先王之命其何爵之爲

葬杞悼公

楚人圍蔡

春秋不專

卷十一

定公

五

此楚囊瓦也其曰人何惡圍也是未或無楚子之命也則其諸
逢君之惡者與

晉士鞅衛孔圉帥師伐鮮虞

不蔡之是救而鮮虞之是伐其何譏耳已

葬劉文公

冬十有一月庚午蔡侯以吳子及楚人戰于柏舉楚師敗績楚囊
瓦出奔鄭

以者不以者也蔡中國也曷爲不以吳子強弱之殊也吳何以
稱子進之也曷爲進之憂中國也其憂中國若何于是楚人圍
蔡閱五月矣而諸侯莫救焉蔡幾亡惟吳子爲其以以與楚戰

而後破楚而圍以解則是吳憂中國也非救蔡與何以不言救
蔡也不能救蔡也蔡圍已解矣曷爲謂之不能救蔡吳之與楚
戰也非能憂中國也志在弱楚而已然則雖有救蔡之事而無
救蔡之心也楚再稱人終惡囊瓦也何以知其囊瓦師敗績而
囊瓦出奔則是敗績者囊瓦也

庚辰吳入郢

郢者何楚都也于是吳誠強而楚誠弱矣吳以國舉狄諸也甫
爵諸矣曷爲遽狄諸甚入郢也不義其救人而以自爲利也然
則吳誠非能救蔡者也夫吳旣誠非能救蔡則子之爵之也何
居曰進吳子所以惡晉侯也

春和... 丙申周敬王十五年 曹靖公露元年 陳懷公 杞僖公過元年

春王三月辛亥朔日有食之

夏歸粟于蔡

曰歸不返也有歸而曰于順之也不曰以粟歸于易之也諸侯無粟諸侯相歸粟正也先曰歸而後曰粟專之也穀梁子曰義邇也

於越入吳

於越者何越也越則其言於越何號舉之也狄之也猶之荆夫楚也公羊子曰於越者未能以其名通也越者能以其名通也吳甫入郢於越何能遂入之乘其虛也夫吳入郢而日矣乃於

越入吳何以且不月也恕之也何以恕之是吳以尤詔之效也

六月丙申季孫意如卒

丙之賊臣不卒翬是也遂之卒變故也然猶去其公子也乃意如何以卒且日之復不去其氏乎是夫子之微辭也其為微辭若何歸獄于定公也言公以其私勞而寵之則是公與逐夫昭公也

秋七月壬子叔孫不敢卒

冬晉士鞅帥師圍鮮虞

丁酉周敬王十六年

春王正月癸亥鄭游速帥師滅許以許男斯歸

春秋左傳卷十一
國未滅也何以謂之滅以其君歸不可以不言滅也何以知其國未滅復見也

二月公侵鄭

公至自侵鄭

夏季孫斯仲孫何忌如晉

秋晉人執宋行人樂祁犁

冬城中城

季孫斯仲孫忌帥師圍郟

公羊子曰此仲孫何忌也曷爲謂之仲孫忌譏二名二名非禮也或曰文無何其諸後儒之所莫敢益者與

戊周敬王十七年

春王正月

夏四月

秋齊侯鄭伯盟于鹹

于是諸侯始復特盟而晉于是不惟失齊且失鄭矣

齊人執衛行人北宮結以侵衛

曰以重辭也

齊侯衛侯盟于沙

晉于是復失衛矣

大雩

春秋左傳

卷十一

定公

一

齊國夏帥師伐我西鄙

九月大雩

再雩早甚也故月之

冬十月

己酉 敬王十八年 曹靖四卒 陳懷四卒

春王正月公侵齊

公至自侵齊

二月公侵齊

各月侵亟侵也

三月公至自侵齊

各月致亟侵也

曹伯露卒

夏齊國夏帥師伐我西鄙

公會晉師于瓦

晉之不以微者將若而年矣曷為不言大夫帥師不以君會大夫也存君臣也夫師與大夫敵耳不以君會大夫獨可以君會師乎蓋師者衆辭也可以重也孟子曰民為貴社稷次之君為輕其于棊林之會有同焉公何以會晉師于瓦也救我也齊伐我西鄙而晉師至于瓦是救我也然則何以不言救我不能救我也晉師在于瓦矣曷為謂之不能救我蓋齊師已在我西鄙

矣而晉師止于瓦是不能救我也

公至自瓦

秋七月戊辰陳侯柳卒

晉士鞅帥師侵鄭遂侵衛

此討貳也曷爲皆以侵言之不能自反也不能自反而徒尤于人奚庸矣曰遂譏專也

葬曹靖公

九月葬陳懷公

季孫斯仲孫何忌帥師侵衛

晉故也于是晉救我

冬衛侯鄭伯盟于曲濮

從祀先公盜竊寶玉大弓

先公者何太廟列祀之羣公也孰從祀乎昭公也以昭公祀諸太廟從于列祀之羣公之末也昭公之葬八年矣曷爲迨于今乃從祀制在季孫也意如逐公俾薨于外踰葬期猶不得以喪歸既葬又禁其主不得入于太廟迨意如死且四年而後得從祀焉然則是善舉也何以不日不月則夫子之微辭也以爲不可詳也詩曰不可詳也所可詳也言之長也曷爲不可詳陪臣執國命也焉知之從祀先公而盜遂竊寶玉大弓是權在盜也盜者孰謂陪臣也大夫之賤者其下窮諸人曰盜賤乎賤者

也是陪臣也夫猶是陪臣也曷為謂之盜有罪也雖然其事則善矣曷為不可詳以從祀先公而因以竊寶玉大弓則是假夫公以濟其私也曰竊取非其有也竊之自盜權在盜也魯其無人矣夫寶玉大弓國寶也寶玉者封圭也大弓者武王之戎弓也是周公之分器也或曰夏后氏之璜封父之繁弱也皆子孫所宜世守而勿敢失焉者也而盜得竊之魯其無刑政矣夫

庚子周敬王十九年鄭獻十三卒曹伯陽元年陳閔公越元年秦哀三十六卒

春王正月

夏四月戊申鄭伯蠆卒

得寶玉大弓

喪之書得之書重國寶也曰得幸之也得不得地非得也盜歸之也曷為不言歸而言得大國寶也且不以權與盜也

六月葬鄭獻公

秋齊侯衛侯次于五氏

曷為次將以伐我也何以知其將以伐我不將伐我我不急平齊矣

秦伯卒

時卒諸侯惡之也何惡乎秦伯即位三十有六年未嘗與諸夏之會盟也或曰以城成周之不會焉

冬葬秦哀公

春秋左傳卷十一
辛周敬王二十一年鄭聲公勝元年
丑周十年秦惠公元年

春王三月及齊平

日及我志也急之也于是晉復失我矣

夏公會齊侯于夾谷

于是晉誠失我矣

公至自夾谷

晉趙鞅帥師圍衛

齊人來歸鄆謹龜陰田

歸田多矣此何以獨言來非我志也大服齊也鄆謹龜陰雖我之故田也而見取諸齊久矣苟非有大服其心其孰肯以為

歸焉故此之稱人非貶之也大我之服之也言我所格諸齊者為已眾也內請之而外歸之曰歸內不請之而外自歸之曰來歸

叔孫州仇仲孫何忌帥師圍郕

猶書圍費也

秋叔孫州仇仲孫何忌帥師圍郕

秋再圍強而不服也

宋樂大心出奔曹

宋公子地出奔陳

冬齊侯衛侯鄭游速會于安甫

叔孫州仇如齊

宋公之弟辰暨仲佗石彊出奔陳

暨者不得已之辭也奔未有言暨者言暨殺佗與彊之罪于辰也身親君之弟而率其大夫以出國誰與為理豈親親之道矣乃佗與彊身為大夫而見脅于人亦庸能自立者與內曰暨暨者為志外曰暨暨之者為志

王敬王二十一年

春宋公之弟辰及仲佗石彊公子地自陳入于蕭以叛

奔言暨乃叛何以言及及者非不得已之辭也不使佗與彊地之罪得殺于辰也曷為不使之得殺于辰奔猶可從人也叛不

可從人也叛者弑父與君之漸也

夏四月

秋宋樂大心自曹入于蕭

是入而叛也何以不言叛非首叛也然入于叛所則叛固可知焉

冬及鄭平

叔還如鄭洫盟

癸卯周敬王二十二年

春薛伯定卒

時卒諸侯惡之也何惡乎薛伯則未之知焉耳

夏葬薛襄公

叔孫州仇帥師墮郕

郕者何叔孫之邑也墮者何毀之也叔孫之邑則內邑也曷爲墮之踰制也帥師以墮之大踰制也家不藏甲邑無百雉之城禮也大夫之邑踰制則公室斯卑矣墮之者所以強公室也叔孫自墮之叔孫格也是夫子之爲也

衛公孟彊帥師伐曹

季孫斯仲孫何忌帥師墮費

費者何季孫之邑也則季孫亦格矣是則夫子之爲也曷爲帥二師以墮之費之踰制尤甚于郕也

秋大雩

冬十月癸亥公會齊侯盟于黃

十有一月丙寅朔日有食之

公至自黃

十有二月公圍成

成者何仲孫之邑也曷爲公自圍之不肯墮也夫墮費之役仲孫與焉曷爲不肯墮成仲孫亦既格矣而制在陪臣也以夫子之爲獨曷爲有未格者政未洽也且其所由來者漸也雖然比者亡矣翼斯剪矣其亦無能爲而已噫書圍費而知費叛季孫矣書圍郕而知郕叛叔孫矣書圍成而知成叛仲孫矣孰謂非

三桓之以身示則也然則三桓亦奚獲而叛公也

公至自圍成

非國而致圍敵成也危公所以惡成人也

甲辰周敬王二十三年十有三年

春齊侯衛侯次于垂葭

夏築蛇淵囿

大蒐于比蒲

衛公孟彊帥師伐曹

秋晉趙鞅入于晉陽以叛

冬晉荀寅士吉射入于朝歌以叛

于是諸侯叛晉于外大夫叛晉于內霸道其不復矣夫

晉趙鞅歸于晉

此叛人也曷為以歸言之易之也言晉之失有罪也蓋曰歸固有與之以歸者也叛而不誅非刑也且三叛而二逐又非平也晉霸其終不復振矣

薛弑其君比

乙巳周敬王二十四年十有四年 吳闔廬十九卒

春衛公叔成來奔

衛趙陽出奔宋

二月辛巳楚公子結陳公孫佗人帥師滅頓以頓子牂歸

春秋左傳卷十一
其以歸于楚與其以歸于陳與以歸于楚也以歸于楚曷爲不
析言之使陳分惡也所以誅黨夷者也

夏衛北宮結來奔

五月於越敗吳于檣李吳子光卒

於越敗吳于檣李則吳子光何以卒卒于敗也卒于敗則何以
不言滅不獲也何以不地不卒于陳也敗而傷歸歸而後卒也
何以不日非一日也敗者一日卒者一日也然則何以不兩日
之兩日之則無以見其敗而卒也

公會齊侯衛侯于牽

公至自會

秋齊侯宋公會于洮

天王使石尙來歸賑

石尙名士也賑者何俎實也祭肉也腥曰賑熟曰燔

衛世子蒯聩出奔宋

世子國本也國本動則社稷搖矣世子奔輕社稷也奔世子亦
輕社稷也

衛公孟彊出奔鄭

宋公之弟辰自蕭來奔

大蒐于比蒲

邾子來會公

會于國非禮也

城莒父及霄

何以不言冬則未知其無冬文與其無冬時與其諸後儒所莫敢益者與

丙午周敬王二十五年十有五年吳夫差元年

春王正月邾子來朝

麇鼠食郊午牛死改卜牛

公羊子曰曷為不言其所食漫也全日牲傷日牛未牲亦日牛

二月辛丑楚子滅胡以胡子豹歸

夏五月辛亥郊

壬申公薨于高寢

非正也

鄭宰達帥師伐宋

齊侯衛侯次于渠蔭

邾子來奔喪

公羊子曰其言來奔喪何奔喪非禮也穀梁子曰喪急故以奔言之

秋七月壬申妣氏卒

妣氏者何定公之妾而哀公之母也妾不書葬與卒也既定公之妾何以書卒有子也公羊子曰有子則廟廟則書葬葬則書

卒也魯君母爲夫人舊矣既哀公之母曷爲不言夫人不夫人之也正也以妾媵爲夫人非正也葬不言小君誠不夫人之也謂其去成風敬嬴齊歸及襄公之母定姒爲有間也

八月庚辰朔日有食之

九月滕子來會葬

丁巳葬我君定公雨不克葬戊午日下昃乃克葬

乃云者難辭也日下昃者晡也夫葬不言時其曰日中日下昃云者以事之變詳之也謹也

辛巳葬定姒

嘗讀曾子問矣曰并有喪則如之何子曰葬先輕而後重其奠

也其虞也先重而後輕乃丁巳葬我君定公辛巳葬定姒則是先重而後輕也

冬城漆

春秋不傳卷十一終

五世姪孫 顓校栞

春秋字音

定公

元年

煬

羊讓反

二年

雉

直几反

觀

工喚反

三年

拔

蒲發反

四年

召

見僖四年

姓

音生後公孫姓同

馳

由又反

卷

音權

囊

奴當反

郢

以整反

十年

郕

音后反又下邁反

十有一年

還

見莊八年後叔還同

十有二年

墮

許歸反

十有三年

葭音加比見昭十一年

射見桓九年

朝如字

比如字

十有四年

佗徒河反

牂子郎反又七良反

檇音醉

蒯苦怪反

贖五怪反

比見昭十一年

牽苦堅反

春秋不傳卷十二

寶應湯啟祚著

哀公

名蔣定公之子也在位凡二十有七年其十有四年春秋絕筆按諡法折仁短恭曰哀

丁未

周敬王二年

元年晉定十八昭二十五

齊景五十四

衛靈四十一

蔡

杞

僖十二

宋景二十三

秦惠

楚昭二十二

吳夫差二

春王正月公即位

楚子陳侯隨侯許男圍蔡

四國圍蔡曷為皆言爵怨之也曷為怨之許其圍蔡也夫圍人之國曷為許之蔡可圍也吳之入郢蔡之以也夫春秋不貴報怨之師而此獨許其圍蔡也何以圍報入也直也況以蔡之弱

也楚之強也而又加以陳隨許之衆也則其舉之宜若振槁然然而不舉之而圍之故君子謂其報怨之道得也

鼯鼠食郊牛改卜牛

夏四月辛巳郊

秋齊侯衛侯伐晉

于是不復以霸晉之辭辭

冬仲孫何忌帥師伐邾

邾之事我謹矣定公之薨親奔喪焉而隨致討焉吾不知其何辭噫觀諸邾其亦知不以禮爲國之祇取辱乎

戊申周敬王二十二年衛靈四十二年卒

春王二月季孫斯叔孫州仇仲孫何忌帥師伐邾取鄆東田及沂

西田

三卿并將君無政也伐國取田虐小國也鄆與沂皆水也日鄆東田鄆東未盡也日沂西田沂西未盡也日及志濫也夫我之三卿并將者有矣此何以知君無政不以其事我謹而貸諸是非公意也且取其田而公無與也

癸巳叔孫州仇仲孫何忌及邾子盟于句繹

以臣及君無君也取其田而盟其君強之也三人伐則曷爲二人盟各盟其得也季孫魯國莫強焉曷爲獨無得以賂二家也曷爲以賂二家季孫之取公室者多矣且嘗逐君矣故取諸邾

之田以歸諸二家而不取也

夏四月丙子衛侯元卒

滕子來朝

晉趙鞅帥師納衛世子蒯瞶于戚

世子不言納也世子曷爲不言納國其所固有也公子出奔返而得國者其順也其易也曰歸其逆也其難也曰入其有奉也曰自不言納矣而況世子也何以言納惡世子也納者內弗受也內弗受則曷爲惡世子以世子爲無道而弗見受于內也帥師以納有伐也曷爲不言伐不正其伐也兼惡納之者也然則曷爲猶言世子惡國人也世子雖出奔先君亦未嘗有命廢之

國人固未可以弗受也況所立者其子則世子爲未絕也天下豈有無父之國哉戚者何衛邑也曷爲不係諸衛公羊子曰父有子子不得有父也

秋八月甲戌晉趙鞅帥師及鄭罕達帥師戰于鐵鄭師敗績

冬十月葬衛靈公

十有一月蔡遷于州來

此吳遷蔡也曷爲若蔡自遷也者不使吳得以遷蔡也則夫子之微辭也何以知其爲吳遷蔡州來也者吳所滅者也遷于吳之所滅之地是遷于吳也

蔡殺其大夫公子駟

蔡遷于州來則蔡何以殺其大夫公子駟不欲遷者也然則其善謀國者乎

己酉周敬王二十三年 衛出公輒元年 秦惠九年卒

春齊國夏衛石曼姑帥師圍戚

離戚于衛不以子有父也蒯賾雖無道而輒遣衆以圍之豈復有人子之心已乎然則衛主兵者也曷為先以齊罪黨惡者也于無父者而黨焉是與于無父也雖然即後以齊庸不足以見黨惡焉子以為無父之人固不與責焉耳

夏四月甲午地震

五月辛卯桓宮僖宮災

曷為不言及敵也日及是祖有尊卑也自我言之則一也曷為不言火有災道也夫非臣子也者曷為不以臣子之辭辭非桓僖之譴也譴在季孫也譴在季孫若何于是季孫專魯之政而弗毀祧廟也季孫曷為弗毀祧廟私之也桓公僖公親盡矣其宮所以存者季孫者出于桓立于僖懷旃于是弗毀書曰桓宮僖宮災蓋即天之所以見怒者而見正也

季孫斯叔孫州仇帥師城啟陽

宋樂髡帥師伐曹

秋七月丙子季孫斯卒

蔡人放其大夫公孫獵于吳

稱人以放國亂無政也

冬十月癸卯秦伯卒

叔孫州仇仲孫何忌帥師圍邾

庚敬王二十四年蔡昭二十八年殺
戊周十九年秦悼公元年

春王二月庚戌盜殺蔡侯申

此弑君也何以不曰弑其君而曰殺蔡侯弑君者賤而窮諸盜故不以上下道道也非盜也何以賤諸盜而不以上下道道是春秋之變文也深絕蔡侯也蔡侯見賊矣何以猶深絕之以存蔡社稷也于是蔡侯弱之甚暴之甚見脅遷于吳不能自立矣而復殺其善謀國之臣蔡侯不斃蔡不存矣社稷重于君也何

以知其非盜有賊也賊者誰姓與霍也何以知其姓與霍弑君賊未討則不葬也夏蔡殺其大夫公孫姓公孫霍冬十有二月葬蔡昭公是弑君者姓與霍也蓋君子于是獄也懼之甚疑之甚何懼且疑乎爾大懼社稷之隕越而深疑夫君之不可弑也于是書曰蔡殺其大夫公孫所以絕申也書曰葬蔡昭公所以討姓霍也申者何蔡侯之名也蔡先公有名申者矣文公申生景公固固生靈公般般生隱世子有有生平公廬及悼公東國昭公申文昭之顯考也何為祖孫同若名無聞焉耳

蔡公孫辰出奔吳

葬秦惠公

春秋左傳卷十二
宋人執小邾子

夏蔡殺其大夫公孫姓公孫霍

此討賊也曷爲存其官與氏而不以賊辭不以其弑君以存國爲姓霍獄也

晉人執戎蠻子赤歸于楚

稱人以執惡之也戎蠻子之名狄也雖無罪見執而亦名外之也晉人執戎蠻子赤則曷爲歸于楚爲楚執也諸侯爲天子執者有矣爲諸侯執者無有也卽爲諸侯執者有矣爲諸侯執而因以與之者無有也文公執曹伯畀宋人蓋非宋志也而此則楚志也承其志執而與之是京師楚也書曰歸于楚猶曰歸于

京師也君子深惡其京師楚也夫中國之不競至矣君子之傷不其甚而不月厭詳也

城西郭

六月辛丑亳社災

記災也社封者也何以災亡國之社也亳亡國也亡國之社蓋揜之屋其上而柴其下俾不得達上下也然則何以不毀亡國之社以爲廟屏戒也

秋八月甲寅滕子結卒

冬十月二月葬蔡昭公

賊旣討也

葬滕頃公

辛周敬王三年五年齊景五十八卒
亥周十年蔡成公朔元年

春城毗

夏齊侯伐宋

晉趙鞅帥師伐衛

秋九月癸酉齊侯杵臼卒

冬叔還如齊

閏月葬齊景公

閏不志志閏不正其閏月葬也喪不數閏也喪而數閏為殺恩也故閏不從諸月而從諸時者見其數閏而已其所閏之月可

勿問而已

上子周敬王三年六年齊安孺子荼元年弒
楚昭二十七年卒

春城邾瑕

晉趙鞅帥師伐鮮虞

吳伐陳

夏齊國夏及高張來奔

叔還會吳于祖

秋七月庚寅楚子軫卒

齊陽生入于齊齊陳乞弒其君荼

先入而後弒陽生弒也陽生弒曷為以陳乞主之不使陽生君

茶也且謀者陳乞也楚公子比君虔矣曷為不使陽生君茶茶不足為陽生君也茶之不足為陽生君若何茶不正也茶不正然則孰正者正者陽生也既陽生正曷為不言公子陽生不子也陽生之不子若何茶雖不正嘗受命于先君矣先君命立之已弑之是弑先君之命也是不父其父也是不子也故逆言之也則何以猶係諸齊以累景公也何累乎景公志亂本也以陽生係諸齊者言陽生之當有國也然則陽生之不父其父由于景公之不子其子也

冬仲孫何忌帥師伐邾

宋向巢帥師伐曹

癸丑周敬王三十七年齊悼公陽生元年楚惠王章元年

春宋皇瑗帥師侵鄭

晉魏曼多帥師侵衛

夏公會吳于郟

秋公伐邾

入不言伐也蓋入邾矣何以先言伐內辭也謂若有名然

八月己酉入邾以邾子益來

益名見執也日以來執而歸也夫造人之國都而俘其君大惡也春秋內之惡諱而況大惡乎何以不諱且詳之乎善補過也蓋能歸之矣君子謂是舊惡而不念也

宋人圍曹

冬鄭駟弘帥師救曹

是無救于曹也曹亡矣曷為猶書救非力所及也故不以其無救而累其救也

甲寅周敬王三十八年曹伯陽十五國亡
杞僖十九卒

春王正月宋公入曹以曹伯陽歸

此滅曹也曷為不言滅不與曹以得滅也滅亡國之善辭上下之同力也故不言日也者不閔曹亡也于是陽之惡莫甚焉罪莫重焉

吳伐我

伐我必言鄙不使寇邇我國也此何以不言鄙使我邇寇也曷為使我邇寇有邇寇之道也吳之伐我邾故之以也則自反而不縮也雖然他之見伐也未或無邇寇之道也者而皆言鄙臣子之辭也此獨曷為不以臣子之辭辭過既補也則是舊惡也且不以自反之辭辭則無以見其補過之善也

夏齊人取謹及闡

外取內地不書不使我為失地也此何以書使我失地也曷為使我失地有失地之道也齊之取我地邾故之以也則自反而不縮也雖然地之見取也未或無失地之道也者而皆不書臣子之辭也此獨曷為不以臣子之辭辭過既補也則是舊惡也

且不以自反之辭辭則無以見其補過之善也

歸邾子益于邾

曰歸順之也善補過也日來時歸無須詳也益之名失國也

秋七月

冬十有二月癸亥杞伯過卒

齊人歸謹及闡

曰歸順之也齊甫取諸我矣曷為遽以為歸以我之歸邾子而

歸我也過之不可以不改也如是夫

乙卯周敬王三十四年九年杞閔公維元年

春王二月葬杞僖公

宋皇瑗帥師取鄭師于雍

穀梁子曰取易辭也以師而易取鄭病矣

夏楚人伐陳

秋宋人伐鄭

冬十月

丙辰周敬王三十四年四年齊悼

春王二月邾子益來奔

公會吳伐齊

會夷狄以伐與國其何譏耳已

三月戊戌齊侯陽生卒

夏宋人伐鄭

晉趙鞅帥師侵齊

曰侵惡伐喪也

五月公至自伐齊

月致惡之也聞齊侯之赴三月矣而後致焉獨奈何其不聞喪而還也是亦伐喪也

葬齊悼公

衛公孟彊自齊歸于衛

薛伯夷卒

秋葬薛惠公

冬楚公子結帥師伐陳

吳救陳

救而書善之也夫嘗人吳矣又嘗子吳矣救而果善曷為獨以號舉焉號舉之則是狄之也蓋非狄吳也胡氏曰所以狄吳者深著楚罪而傷中國之衰也陳者有虞之後也嘗滅于楚而僅存耳今復狡焉肆虐而諸侯恬焉莫救而救之者乃夷狄之吳則無復有方伯連帥之望矣故曰吳救陳也者固猶之曰狄救齊也云耳

丁周敬王三十有一年齊簡公
巳十六年壬元年

春齊幽書帥師伐我

春秋左傳卷十二
二
伐我不言鄙使我邇寇也自反而不縮也是未嘗補過也曷爲亦以自反之辭辭譏也他之見伐也多矣是未或無邇寇之道也者曷爲猶于此焉譏不可勝譏固將壹譏而已則莫不縮乎會夷狄以伐與國且聞其赴而猶宿兵其地再彌月焉而後去之也而况尋復會夷狄以伐之也

夏陳轅頗出奔鄭

五月公會吳伐齊甲戌齊國書帥師及吳戰于艾陵齊師敗績獲齊國書

伐言公戰曷爲不言公以齊主戰不可以復言公也以齊主戰則曷爲不可以復言公不以臣及君也存君臣也雖然吳以號

舉狄也乃以公會之而戰復不言則公之不能何如也是又君子之微辭也不致所以異于伐喪也或曰有獲矣則無危也

秋七月辛酉滕子虞母卒

冬十有一月葬滕隱公

衛世叔齊出奔宋

戊午周敬王三十有二年

春用田賦

其日用田賦何用者不宜用也賦非田用也賦者軍旅之征也先王制土藉田以力而砥其遠邇賦里以入而量其有無故田主出粟以足食也賦主出軍以足兵也今也而以軍旅之征征

諸南東之畝則加稅益兵而重困農民也是廢先王之制也雖然曷爲不言初蓋我用田賦之初而用田賦者則實不自我初也

夏五月甲辰孟子卒

孟者何字也子者何氏也孟子者何昭公之夫人也昭公之夫人曷爲不言夫人而曰薨不成其夫人也曷爲不成其夫人娶同姓也蓋昭公娶于吳爲同姓則綴之以姓而弗別合之以食而弗殊固不命于天子而不可以見于宗廟也夫吳者姬姓也子者宋之姓也然則是孟姬也其曰孟子深諱之也謂若宋女然乃從其諱而諱之臣子之辭也雖然不曰夫人子氏薨而曰

孟子卒則其實固不可揜矣夫何以不曰子氏也以宋爲無是女也且不言夫人矣字之所以別于妾之辭也

公會吳于橐臯

秋公會衛侯宋皇瑗于鄆

宋向巢帥師伐鄭

冬十有二月螽

月螽非螽月也

己未周敬王三十八年十有三年

春鄭罕達帥師取宋師于岳

宋病矣

夏許男成卒

時卒諸侯惡之也何惡乎許男成無聞焉耳或曰受封于諸侯而遂爲之臣也

公會晉侯及吳子于黃池

吳何以稱子吳主會也吳主會則晉非主會也曷爲先言晉侯不與吳爲之主也其曰及吳子何會兩霸之辭也不與吳爲之主則曷爲以會兩霸之辭言之不泯其實也乃不泯其實而終不與吳爲之主則不敢拂于經也

楚公子申帥師伐陳

於越入吳

秋公至自會

晉魏曼多帥師侵衛

葬許元公

九月螽

冬十有一月有星孛于東方

其曰于東方曰弗加諸宿也弗加諸宿則其曰于東方何且見也夫孛固非彗也或曰卽彗也衆人指其象聖人道其情

盜殺陳夏區夫

十有二月螽

各月螽再螽也

庚周敬王三十有四年晉定公午三十一年 齊簡公壬四年 蔡成公
申周十九年 在獲麟後 衛出公輒十二年 紀閔公
朔十年 鄭聲公滕二十年 陳閔公越二十一年 楚惠王章
維六年 宋景公樂三十六年 秦悼公十一年 楚惠王章
八年 吳王
夫差十五年

春西狩獲麟

狩地也不地非狩也非狩而曰狩穀梁子曰大獲麟故大其適也曷為大獲麟麟者仁獸也有王者則至無王者則不至有聖人則至無聖人則不至韓氏曰麟為聖人出也其不言來不外麟于中國也其不言有不使麟不恒有于天下也曷為于焉絕筆焉胡氏曰其以天道終乎曷為于隱公乎托始焉王道其不亢矣夫公羊子曰春秋曷為始乎隱公祖之所逮聞也所見翼

辭所聞異辭所傳聞異辭何以終乎哀公十四年曰備矣君子曷為為春秋撥亂世反諸正莫近諸春秋則未知其為是與其諸君子樂道堯舜之道與夫不亦樂乎堯舜之知君子也制春秋之義以俟後聖以君子之為亦有樂乎此也

春秋不傳卷十二終

五世姪孫 顓校葉

春秋字音

哀公

二年

沂

魚依反

句

古侯反

三年

曼

音萬又莫半反後同

獵

良涉反

四年

霍

虛郭反

五年

毗

頻夷反

六年

荼

音徒又丈加反

祖

莊加反

七年

瑗

于卷反

八年

闡

尺善反

過

音戈

九年

雍

於勇反又於用反

春秋不傳

卷十二哀公

十有一年 頗破多反

十有二年 橐章夜反 又音託

十有三年 區烏侯反 又苦侯反

崑五咸反

郎音云

余垂髫時秉訓于雲樵伯父嘗慨然示士瀛曰先王父滋人公

著有春秋不傳十二卷杜詩箋十二卷刪剩詩文賦稿並詩文續

若干卷惟春秋不傳已由江蘇巡撫採進載入

四庫全書其稿本藏於劉君所好軒汝成立後當索而寶之所以

重先人手澤也不幸所好軒火遺書竟付餘燼為悵然者久之茲

敬齋姪出其家藏不傳一書雜誦之餘如獲異寶夫失之於珍藏

得之於創見豈書之興廢亦有數存於其間與爰悉心讎校勉力

付梓以為誦清芬之助云爾嘉慶己卯年仲春之月四世孫士瀛

謹跋

春和入作

景



